



Il zovin Minut al leve cjaminant pe vie di chel centri di vacancis. Si cjatave li compagnant sô mari che, par prescrizion mediche, e faseve dai bagnis intes aghis miracolosis (a disevin) di chê lagune simpri plene di int, che e someave il cjalderon di une inmagadore. Dal fondon a sgorgolavin cetancj minerâi che a ingriviavin il licuit, fasint sî che cence savê nadâ tu ti mantignivis vongolant sore di jê, cence fâ nissun moviment. Jessint chês aghis curativis, la gran part de int che tu viodevis dentri di chel cercli di aghe, e veve il cuarp indulîts.

Minut, intant che al fantasiave sorepinsîr, al leve cjalant lis vetrinis des buteghis, a no 'nd jere cui sa ce di novitâts. Dibot al sintî clamâsi pal non: - Minut, Minut! -, ma cui podeval cognossilu li ta chel lûc? Minut si zirà e al ricognossè so barbe Grispin, fradi di sô mari.

Grispin al cjalà il nevôt cuntune muse stranide, disorientade e temerose. Po come se za al savès la rispueste e cul flât stratignût i fasè une filaine di domandis: - Ce fasistu ca, cun cui sêstu vignût, in ce locande sêstu logât?

Minut, devant di chê foghe imburide, si sintî come cjapât in fal, e une a la volte i rispuindè a lis domandis, disintji che al jere li cun sô mari e che l'albierec si cjatave in face ae splaze dai

fenicotars. Cheste ultime rispueste al parè che lu vês sollevât, ma di ce?

A cjamarin un toc di strade insieme, dibot Grispin si fermà e i disè a Minut: - O ai bisugne di fevelâ cun te, no come to barbe, ma di om a om. - E li al scomençà, contant che la sô femine e jere simpri malade e che... e che... un om.. al è simpri un om. Tal imprim Minut nol capive plui di tant, ma jentrant intal discors, so barbe i disè: - al è za un pâr di dîs co soi ca cuntune morose, si cjatin ogni tant par fânus i bagnis, che a dî il vêr a son miracolôs! - So barbe i fasè zurâ che di chest incuintri nol veve di savêlu nissun, ma nissun de famee.

Cu la promesse di cjatâsi tal doman, Grispin saludant il nevôt al tirà ju un porco e là disint: - No si po stâ tranqui e cuiets nancje a cincent kilometris di cjase!

Tal doman Minut si presentà ae cunvigne e nol cjatà nancje l'ombre di so barbe Grispin.

di Galliano di Buenos Aires